

كلاد على السطر



أحمد فتاد نجم



٣٣ شارع رمسيس
القاهرة - ت : ٧٦٠٣٩٤



فى إحدى الأمسيات التى أقمتها بالجزائر أصر
الحاضرون على فتح حوار عام تُقدم إلى من خلاله
مجموعة من الأسئلة التى تشغل حيزاً من تفكير الناس
آنذاك وذلك بعد أن أنتهى من تقديم الأمسية الشعرية
ولم يسعنى إلا أن أنزل على رغبة الناس . . وإنتهت
الأمسية الشعرية وبدأت الأسئلة تنهال على رأسى كما
تنهال حجارة الأطفال على رؤوس الصهاينة فى الوطن
المحتل .

وعلى تنوع الأسئلة لم يعجزنى الرد ولم تخننى
بديهتى قط إلى أن وقف طفل لايتعدى سنه الثانية
عشرة على أكثر تقدير فأبدى أولاً إعجابه بقصيدة خالد
الإسلامبولى ولكنه سألنى

- إلى متى نظل نتكلم مع وعن الحكام العرب ونحن نعلم
جيداً أن لأمل فيهم أو منهم

وأشهد أن السؤال قد نزل على رأسى كالصاعقة
فلم أجد له إجابة تقنعنى أنا أولاً وبطبيعة الحال لجأت
إلى ذكائى أو جُبْنى فسألته
- ما إسمك



- طاهر
- كم عمرك
- إثنى عشر
- إسمح لى يا أخ طاهر أن أسالك دون حساسيات كيف
تفهمون شعري وأنا شاعر العامية المصرية القحة
فأجابنى
- قد نفهم من مفرداتك أربعين فى المائة
فقللت له
- والستون الباقية
فأجاب الطفل على الفور
- نحسها يا أستاذ ولذلك فتأثيرها يكون أعمق وأبقى
وإنفجرت القاعة بالتصفيق لهذا الطفل الكبير بينما
راح العرق يتصبب منى وأنا أشعر بالتضاؤل أمام هذا
العلاق الصغير (إن صح التعبير) وأشهد أن هذا
الحدث إلى جانب إرضاء نرجسيتى قد أضاف إلى
معلوماتى ومعتقداتى الكثير وأوضح لى معنى التعبير
السائد - الشعر إحساس -

أحمد فؤاد نجم



مقال



وعملت بداع
وباغنى فى العرب
تفاريح
وابين لوالى خزامى
والصدر منى
جريح
البت ناجة عنوده
عشجها تباريح
الشعر
ليل المظالم
والوجه
بدر صبيح
حكمت سحابه ظليمة
ع البدر ما نور
يا ميت ندامه
ع اللى
راح فى هبة ريح

يا مصر مدهشة

يا مصر يا مدهشه
لولا الخشا
من عزتك فينا
لا حكي كلام ما انحكى
ع اللى انحكى
واللى جرى فينا

ودينا من قلبنا
طبع الوداد زينه
وادينا من قلبنا
شرع الوداد فينا
وعشقنا من قلبنا
واشتقنا من قلبنا
وسألنا من قلبنا
وصبحنا
ومسينا
غربا فى حب الوطن
وانتى الهوى والوطن
واللى نفاه الوطن
يلقى الوطن فينا
يا مصر



الحال

من طول ترحالنا ف أوحالنا
بنصعب على حالنا
من غربه لحيه لترحيله
ما يحط رحالنا
على فين يا هوانا مغربنا
ومعفرننا
ومتربنا
اللى يصبنا يمسينا
واللى يبعنا يقربنا

من فين رايعين
ولفين .. جايين
ورا إيه
دايرين
ماحناش دارين



قدامنا سراب

مهما مشينا

وورانا عذاب

مهما رحلنا

دوامه

تاخذنا ولا تجيبش

والجاهل

يمشى ما يحسبش

والعارف

يقرا ما يكتبش

واتحط آخرنا ف أولنا


واحتار ترحالنا ف أوحالنا

من طول ترحالنا

من غربه لحيره لترحيله

ما يحط رحالنا

زيارة الى ضريح




دعوت على عمرو
فمات
فسرني
فعاشرت اقواما
بكيت على عمرو

شاعر قديم

عبد الناصر

السكه مفروشه
تيجان الفل و النرجس
والقبة صهوة فرس
عليها الخضر بيبرجس
والمشربية عرايس بتبكي
والبكا مشروع
مين دا اللي نايم
وساكت
والسكات مسموع
سيدنا الحسين
ولأ صلاح الدين
ولأ النبي
ولأ الإمام
دستور يا حراس المقام
ولأ الكلام بالشكل دا ممنوع ؟
١١



على العموم
أنا مش ضليع فى علوم الانضباط
أبويا كان مسلم صحيح
وكان غبى
وكان يصلى ع النبى
عند الغضب
والانبساط

أبويا
كان فلاح تعيس
فى ليله ضامه
خلفوه
و ف خرقة سودا
لفلفوه
١٢




و ف عيشه غيرا
طلعوه
ولصموه
وطلسموه
ودجنوه
وجهزوه
وجوزوه على عماه
فكان محير في هواه
ما بين أمي
وما بين الجاموسه
وكان يخاف يقتل ناموسه
وكان خجول خجول خجول
لكنه كان دائما يقول
استغفر الله العظيم
من باب الاحتياط

أبويا طلعتوه حمار
فكان طبيعى
يجيبنى جحش
لا اعرف نبى
من أجنبى
ولا مين ما جاش
ولا فين ما راحش
موسى نبى
عيسى نبى
محمد العرب نبى
وكل وقت وله أذان
وكل عصر
وله نبى

واحنا نبينا كده
من ضلعنا ثابت
لا من سماهم وقع
ولا من مره شابيت
ولا انخسف له القمر
ولا النجوم غابت

أبوه صعيدى .. وفهم
قام طلع طابيط
ظبط على قدنا
وع المزاج طابيط
فاجومى من جنسنا
مالوش مره سابيت
فلاح
قليل الحيا
اذا الكلاب عابيت
ولا يطاطيش للعدا
مهما السهام صابيت
عمل حاجات معجزه
وحاجات كتير .. خابيت
وعاش ومات وسطنا
على طبعنا .. ثابت
وان كان جرح قلبنا
كل الجراح طابيت
ولا يطولوه العدا
مهما الأمور
جابيت



هلى بشايرك

هلى بشايرك
والزهور نعسانه
تصحى الجنائن للندى
عطشانه
يا حلوه يالى
وردك تَمَللى
تيجى المواسم والفصول
وتولى
والحب حبه
فى القلوب منصانه

دار الحبايب
واللى داير فيها
النيل هجرها
والندى جافها
صليت ليالى للمطر
يسقيها



رجعت صلاتى م السما
عطشانه
هلى بشايرك
والزهور نعسانه
هلى بشايرك
وانتى احلى بشاره
ساعة ما تصحى فى الصباح
قداره
يسرح ربيعك
يطرح جميعك
يتمد أمرك ع الزمان
ويطيعك
أمرك محبه
و المحبه ديانه
هلى بشايرك
والزهور
نعسانه

وحدكِ

وحدك
وانا وحدي
أبكي ساعات
وحدي
طول السفر والليل
يا غربتي وحدي
يتقل على الويل
أغزل و أقول
واحدى


صحرا وانا جمّال
شيله وانا شيّال
قصه
وانا موّال
غربه .. وانا وحدي



يا ريما
يا ريما
يا زهرة الصبار
يا خدودك الشتوى
يا عيونك الأنهار
طول الخريف عمرك
بين الحنين والنار
بتلوّنى الاحلام
وتفتحنى النوار
وانا خريفى دوم
بين العطش والصوم
ولا لى جلد ع النوم
ولا السهر
وحدى

يا لشام

مدخل
الحكمة



الشعر مهري
وانا مسافر
اجيب مهر
عقد النجوم
غنوتك
واقطف جنى زهر
يا بنت شيخ العرب
يا م الضفاير
طرب
والشفتين
احلام
طاب الهوى يا شام
واحتار قتيلك
أنا
ايه اللي مشانى هنا



ومين مجمعنا سوا
الجرح
ولا الدوا
ولا السفر يا شام
فى الغربه والاهام
قبل العتاب والميجنا
يسعد صباحك
والعنب من كرمنا

عابر سبيل مريت هنا
عابر سبيل
شايلى على شفافى العطش
والنيل فى قلبى سلسبيل
عابر سبيل

عابر سبيل عطشان غُنا
واعوذ بالله من انا
انا اللى هزيت القنا
غنى
رويت منه القدح
وسكرت
بالصوت والصدا
وسافرت فوق خد الخريف
قطر الندى
زهْر
طرح
انا كده بستان فرح
طالع فى أرض المستحيل
عابر سبيل
يسعد مساكم يا اعز احبابنا

العشق ذاهب مذاهب

العشق ذاهب مذاهب
من قديم الناس
فيه ناس بتعشق قمر
وناس بتعشق كاس
وناس بتعشق حجر
وناس بتعشق ماس
وناس بتعشق صنم
وناس بتعشق ناس



وانا اللى عشق المداين بعد النسا
كيفى
كل الحوارى جوارى
وادخل
على كيفى
اسكندريه صبيه
من بنات البحر مخطوفه
يا شط من بدعها
ضحكت بنات الانس مكسوفه
واسكت ما تسكتشى
يا موج يابو وشه
لا تشوف ولا تسمع
وتوشوش العشه
سر المدينه ف بير
مكفى عليه مواجير
زمر على حالك
يا موج يابو الزمامير
وشوش فى ودن الرمل
لم الشمل
فى شرع الهوى
جرح ودوا
طاب المتيم واستوى
يسعد زمانك
يا لياالى الصبونه

للبناء الورد

ورق
ورق
ورق
ورق ورق ورق
افكار ورق
اشعار ورق
شعار ورق
شعارات ورق
ثوار ورق
ثورات ورق
احلام ورق
حكام ورق
ورق ورق ورق ورق



آه يا وطن على الورق
الحلم فيك
على الورق
والعلم فيك
على الورق
وخدعنى فيك
صوت الورق
وسافرت فيك
على الورق
وحلمت بيك
برا الورق

بستان ظليل
ومشربيه وحمّام هديل
وسلسبيل
وقله للعطشان سبيل
وبحر نيل
فيه بنت حلوه

وواد جميل
هجموا التتار
كلاب ورق
قتلوا الرسوم
على الورق
وقالوا حلمك مستحيل
وحتى لو كان ع الورق
وكفنونى بالورق
وضيعونى
فى الورق
ورق ورق
ورق ورق
مقهور وماشى فى الورق
غرقان عرق
حلمى انسرق
شايل على قلبى الهوى
كتبوا الدوا على الورق
ورق ورق ورق ورق

وفجأتني
لمع .. برق
وقابلتها على الورق
مع انها
مش في الورق
ولا عمرها
كتبت ورق
ورق ورق ورق ورق
شفت العروسه ع الورق
الشمس ؟

لا

البدر

لا

النجمه

لا

النسمه

لا

البحر

لا

الشعر


لا

السحر

لا


لأدى الحقيقه المرعبه
قاسيه وبسيطه وطيبه
زيك
وزيى
وزى بنت باحبها
زى الربيع والحب
والناس كلها

كده الحصاد
كده الجنى
كده المسائل تنحسب
كده الكلام
كده الغنا
كده القصيده تنكتب
أه يا سناء الجرح
يا بنت الألم
كل الرايات اتنگّست
وانتى العلم




ورق ورق
ورق ورق
ورق ورق
أه يا وطن
غرقان ورق
وعملت فيك
مركب ورق
وسندباد ملاح ورق
وسبحت فيك
بحر الورق
وركبت فيك
أمواج ورق
وصارعت فيك
حيتان ورق
وعشقت فيك
لحظة غرق
كشفت كنوزك يا وطن
تحت الزباله و الورق
يادى الربيع لاخضر
فوق الخريف
طالع
يانبعه فى الصحرا
قلبى الحزين والع
اسقيني يا شابه

يمكن تطفيئني
وان جفت الميه
ريقك يكفيني
آه يا سناء القهر
يا بنت الأنين
يا ضربة الناس الغلابه
الموجوعين
يا م العيون المغرمين
أبصر بمين
يا هلترا بعد الوطن
بتحبى مين ؟
ردى على الأحباب
يا زهرة العناب
ان كان دعاكى الهوى
وان كان فتحتى الباب
آه يا سناء الرعد
يا بنت الحسوم
يا نجمه يا متحيره
بين الغيوم
باسأل
وانا من كسفتى ف نص الهدوم
قلبك صغير يا حبيبتي
ع الهموم
وازاى قدرتى تعشقى



وطن فسيح
مطعون
جريح
الدنيا طلعت للقمر
وهو متكفف
كسيح
يا هلترا قلبك محيط
ولا انتى يا بنت
المسيح
آه يا سناء الورد
يا بنت الربيع
يا اغلى زهره فتحت
قبل الربيع
قلبك صغير صغير
انما جرحك وسيع
ورق ورق ورق ورق ورق
وفضلت الون
فى الورق
انهار ورق
بساتين ورق
اشجار ورق
عصافير ورق
اطفال ورق
فساتين ورق

قُصِرَ الكلام
جبت الربيع بن الربيع بن الربيع
ونقشت منه
ع الورق
طرزت بالياسمين
طرحه وعشر فساتين
ولضمت عقد الفل
لجلك
يا ست الكل
وفردت غصن البان
على قدك الفتان
ونقشت بالحنه
شباك على الجنه
طلبت من الشباك
قابلوني الف ملاك
رافعين على الأعناق
انا الشهيد سناء



مرجئة الملك هو الملك

- ١- على عليوه
- ٢- الزار
- ٣- طفى النور
- ٤- شرم برم
- ٥- أهوى المدام
- ٦- عطشان يا صبايا
- ٧- حادى يا بادي
- ٨- ياماً مويل الهوى
- ٩- الموعودين
- ١٠- حاوى توت
- ١١- حلقاتك - السبوع
- ١٢- قلعتك حرز
- ١٣- يا ربنا
- ١٤- تام نام
- ١٥- طنوش
- ١٦- دفشنجى
- ١٧- أمر م الصبر
- ١٨- يحكى أن
- ١٩- الله يا دايم
- ٢٠- نزلت أدب
- ٢١- تك تك تك
- ٢٢- هنا مقص

عليه

- ادعوله ادعوله
- مين ؟
- ابو السلاطين
- يخرّب بيته و ينشف زيتّه
- كل ما يمشى يقول قوانين
- ليه ؟
- نازل طالع
- شافط بال
- حرق العالم دنيا ودين
- مين مين مين مين ؟
- على عليه
- ياللى
- ضرب الزميره
- ياللى
- وضربها حربى
- ياللى
- نطت فى قلبى
- ياللى

- قلبى رقاص
- ياللى
- فى بلاد الناس
- ياللى
- والناس مجاريح
- ياللى
- من عكس الريح
- ياللى
- والريح حردانه
- ياللى
- لا تبوح بامانه
- ياللى
- و امانه يا خلى
- ياللى
- تعشق وتقوللى
- ياللى
- على قصعة حنه
- ياللى



- فى جنينة حنا
- يالى
- حنا وزان
- يالى
- عند السلطان
- يالى
- سلطان هبوش
- يالى
- ابو زمه فاشوش
- يالى
- والسبحه ف ايده
- يالى
- بيعد عبيده
- يالى
- وعبيده كتار
- يالى
- زنهان زنهان
- يالى

- زنهـار افراح
- ياللى
- ياكلوا التفاح
- ياللى
- وصفوف مساكين
- ياللى
- ضايعين ضايعين
- ياللى
- فى الفرح ناسينا
- ياللى
- وف همه داعينا
- ياللى
- يسرق ضحكتنا
- ياللى
- ويدوق غناوينا
- ياللى
- غناوينا عذاب
- ياللى

- م الباب للباب
- ياللى
- وعذابنا حنان
- ياللى
- مش للسلطان
- ياللى
- سلطان الشوم
- ياللى
- سرق الفيوم
- ياللى
- وخدوه محتار
- ياللى
- م الدار للنار
- ياللى
- نصبوا له الزار
- ياللى
- نصبوا له الزار
- نصبوا له الزار
- نصبوا له الزار

الزائر

شيخ محضار
يا شيخ محضر
تلفراف
- لازم تحضر -
مولانا السلطان يا دلاله
مش رايق
متغير باله
صوابنا العشره نقيدها له
بس انت استعجل واحضر
بس انت استعجل واحضر

الله حي
الله حي
شبه النجمه ف قلب الضى
طالع بارق
نازل حارق
زيه ما فيش فى العالم زى
الله هاللا هاللاحى
الله هاللا هاللاحى

يا بغدادلى يا مبروك
بركاتك وكرامه لابوك
مولانا السلطان موعوك
حضر كراماتك واحضر
حضر كراماتك واحضر



هابش رابش كلب كلابش
طَحَشُ فَحَشُ
جحش مطابش
هَبَرُ عَبَرُ يَأْتِي الْخَبَرُ
عن سلطانم
بدنه ملايش

مولانا السلطان مخطوف
من بدويه بتغزل صوف
فتحت قلبه بقرن خروف
فتحه ودخلت تتمخطر

الله حي
الله حي
شيخ شهبندر تاجر جى
حابس حابس
عنده مكابس
تاخذ قطن
وتدى ملابس
يطلع شيخ شهبندر لابس
كسم غريب
على اهل الحى
الله هاللا هاللا حى
الله هاللا هاللا حى

سلطانم يا ما شا الله عليه
موصوف له
وانا عارف ليه
يتوضا وينقع رجليه
فى الدم ويشرب اكثر

شيخ محضار
يا شيخ محضر
فى الدم ويشرب اكثر

طفي النور



طفوا النور
طفوا النور
ربطوا العقرب فى الصرصور
طفوا النور
طفوا النور
لضموا العسكر فى المأمور
طفي النور يا بهيه
كله عساكر دوريه


جوزك راجع من سوقه
راكبه الهم و بيسوقه
نطوا العسكر من طوقه
دوريه ورا دوريه
طفى النور يا بهيه
كله عساكر دوريه

جوزك سارح على غيطه
بيلضّم همه فى خيطه
قزحوا العسكر على حيطه
لعبوا عساكر حراميه
طفى النور يا بهيه
كله عساكر دوريه



خالك راجع من مكه
شايل سبحة و دريكة
طلعوا العقاريت ع السكه
ألف ولاد الجنينه
طفى النور يا بهيه
كله عساكر دوريه

ولدك رايح على عكا
يفتح سكه على سكه
طلعوا عليه
سدوا السكه
و اتحاصر رايحه جايه
قيدى النور يا بهيه
كل العسكر حراميه



شرم برم

دنیا غروره و کذابہ
لکن جمیلہ و جذابہ
مجاریح .. و نعشقا صبابہ
آدینا وادی حال الإنسان
شرم برم حالی تعبان

مجنونہ خالص تراللی
بکلمة تعزل و تولى
وف لحظة تاخذ ما تخی
أمان
أمان یا لللی أمان
شرم برم حالی غلبان



دلوعه ماشيه بتتغندر
بين الإمام و الشاهبندر
والغاوى قاعد يستنظر
حب العزيز يطرح رمان
شرم برم حالى غلبان

يا حلم يا جناح المساكين
يا وعد من ورد البساتين
ملاييين ربيع رايعين جاين
و الكون حزين من غير الوان
شرم برم حالى غلبان



أهوى المدام
واشرب تمام
واسكر و انا
و انا فى انسجام
يا لاللى
ترالى
قراشوللى
يا حلوللى

عطشان يا صبايا

عطشان يا صبايا
درب الهوى صعب
والصحرا مديده بعيده
عطشان و الميه قريب
والخطوه عذاب و متاهه
و الحلم اخضر و عجيب
و انا كل ما اقول التوبه
ترمينى المكاتيب
يا حبيبى يا نجمة ليلى
يا منور لى السرايب
مكتوب على كف العاشق
روح بلدك يا غريب
دى الغربه فى الزمان دا
تتونس بالحبيب



حادي بادي



- حادى يا بادى يا زهرى النادى
فكرك إيه
عمك شنطح جالك ينطح
تديله إيه
ادى له قطفه
- تدى له قطفه ؟ قطفة إيه !
قطفه ما قطفه فكره وخاطفه ..
أمال قوللى لو انت يا خلى
عمك شنطح جالك ينطح .. تديله إيه
- كان ياما كان
كان دلوقتى و لا زمان
اهو دلوقتى زى زمان
كانوا جماعه ف ارض وسيعه ..
.. وفيها طبيعه وناسها الصافيه بتروى ..
.. الصحرا بعرق العافيه الأرض ..
.. الساكته تبوح بساتين
- الله الله
- قمح وياسمين
- يا مشاء الله
- والناس عايشين
- بما يرضى الله

يا أمه مويل الهوى

يا أمه مويل الهوى
يا أمه مويليا
طعن الخناجر ولا
حكم الخسيس في
سألت شيخ الطريقه
مارضيش يجاوب سؤالى
و دارى عنى الحقيقه
وفاتنى حابر فى حالى




سألت شيخ الأطباء
دوا الجراح اللى بيا
نظر لى نظرة محبه
و قال دوايا باديا

يا امه مويل الهوى
يا امه مويليا
طعن الخناجر ولا
حكم الخسيس فى

يا مصر و انتى الحبيبـه
و انتى اغترابى و شقايا
و انتى الجراح الرهيـبه
و انتى اللى عندك دوايا
علمنى حبك عبارـه
سهله و بسيطه و عفيه
شرط المحبه الجساره
شرع القلوب الوفيه

يا امه مويل الهوى
يا امه مويليا
طعن الخناجر ولا
حكم الخسيس فى

الموعودين



للموعودين الدنيا
مش للحسابين
سلطان أمر .. فساد قانون الكسابين
زمان قالولنا فى المثل
عيش يوم بصل و يوم غسل
اتارى اللى وصل وصل
ماتقولش فين و ليه و مين

دنيا عجيبه و مدهشه
مافيش اصول ولا خشا
ترفع رجب يا للعجب !
ينزل حسين جنب اسماعين
تعمل ملك بالزميلك
يحكم بلاد المسلمين
لعبه عجيبه و مدهشه
مافيش اصول ولا خشا

وادى العبارة يا ولد
لعبه على عرش البلد
بين اللى مات واللى اتولد
والموعودين و الحسابين

جاود تود

لا كده لا كده لا كده لا كده لا
تبقى دى نكته سخيغه بحق
احنا يا عم بنلعب لعبه
طلع لى دماغك م الشق
تسرح منى
ح اضيع انا منك
نفضل نسأل لما نطق
لا كده لا كده لا كده لا كده لا



احنا بنحلم حلم جنونى
فما زال الأحلام مشروعه
بزوال الكون المتقن
و حصول الأشياء المنوعه
زى الحاوى لما بيلعب
حلم البيضه و الكتكوت
احنا بنحلم
يعنى بنلعب
حاوى حاوى حاوى توت
أدى البيضه
و اللى شواها
واللى لهفها بالنبوت
ثم خبطها
ثم لهطها
ثم شفطها حاوى توت
حاوى حاوى حاوى توت
لعبه تفوت و لا حد يموت



حلقائك
برجالاتك
حلقه ذهب فى وداناتك

يا حنتوسك يا فنتوسك
يجعل عمرك قد فلوسك
جتنا الشمس و طالبه تبوسك
خجلت من ضى ابتساماتك
حلقائك برجالاتك
حلقه ذهب فى وداناتك

حصنتك ما تشوف الذل
بخرتك بخدود الفل
ورقيتك من عين الكل
النبي حارسك من عتراتك
حلقائك برجالاتك
حلقه ذهب فى وداناتك





قلعتك حرز


قلعتك حرز
لبستك حرز
القمطه حرير
والصوف على الشرز

قلعتك طاقه
لبستك طاقه
وكتبت حجابك
على وبر الناقه
يكفيك الشين
و العيا والدين
وسكوت الناس
وكلام العين

قلعتك قبه
لبستك قبه
إبعد يا شيطان
و تعالى يا شابه
لفيه و ارقيه
و اسهرى سليه
و ف برد الليل
ضمنى و دفيه


قلعتك عافيه
لبستك عافيه
و رميت هلاهلك
فى الميه الصافيه
و غسلت ذنوبك
و قرئت مكتوبك
السعد مواعدك
والهنا محسوك





يا ربنا يا ربنا
يكبر ويبقى زينا
طق الودع
سحر و بدع
سعد السعود فى قصرنا

تتا تتتا خطى العتب
و دوس على كل العتب
واللى انقرا واللى انكتب
و اسرح فى نعمة ربنا



خد البشاره يا حسن
و افتح لنا الفال الحسن
و ابعت على عيونه الوسن
نوم العوافى و الهنا


يا ربنا يا ربنا
يكبر ويبقى زيننا
طق الودع
سحر و بدع
سعد السعود فى قصرنا



نام نام نام نام

برجين حمام	و ادبح لك
طاجن و برام	و اعمل لك
سهران ما بنام	و اقعد لك
زعبوط و حرام	واغزل لك
بننتين م الشام	و اخطب لك
ورد الأحلام	و اقطف لك
ع الورد كلام	و اكتب لك

نام نام نام نام



بايتين الليل
على نار الويل
و دموعهم سيل
م الراس للديل
لو جالك ميل
منهم بالخييل
شايلينك شيل

حسادك
يتقلوا
سهرهم
كلبشهم
شتتهم
واتحصن
وملايكه

نام نام نام نام


طنوش




طنوش قال لك طناش
و ما تعصلجلناش
تعمل لى فيها عنتر
دا شئى ما يخصناش
بس البعيد حيتعب
و تبقى حالته أصعب
خليك من حزب أشعب
طنش .. تاكل بلاش
تنح قفاك و فأم
و ازرع وشك أوالح
ما تحطش المصالح
ما بين خاصم و صالح
ما فيش خصومه دايمة

تفضل ع الوش عايمه
و لا القيامه قايمه
إلا ف لحظة طنّاش
غفير و خالته دايه
لو مسكوه عصايه
و لبسوه عبايه
و حطوه ع المرايه
حيشوف أتخن أمير
ملعون ابو الفقير
و تسأل عن أصوله
يقول ما شفتهاش
طنّوش قالك طنّاش
و ما تعصلجلناش





دفشنجى ابن الهتشنجى
داخل فى الدور جحشنجى
عامل ضريب و نشانجى
و مطلع ضفر و ناب
كداب كداب و الله العظيم كداب



مخبول و عطوه السلطه
بقى سَلطه و يَا البَلطه
مع إنه اتسلطن غلطه
و يا عالم بالاسباب
كداب كداب و الله العظيم كداب

و اكمنه مهزأ واطى
عائش طول عمره مطاطى
أول سبحان العاطى
نسى اصله و فصله و عاب
كذاب كذاب و الله العظيم كذاب

نلاعبكم وتلاعبونا
قلناها وسمعونا
واندمج ابن الجنونه
زى السيرع القبقاب
كذاب كذاب والله العظيم كذاب

أمر من الصبر

أمر من الصبر سؤلانك لغير مولاك
يصفر لونك وقليل ان سمح وعطاك
الندل صاحب قليل البخت واتواعدوا
يمشوا رفاقه بطول العمر ما يباعدوا
وقى الأصيل زى الغمامه بوعدہ
والندل غير طريقه والزمن اهو ساعده
وبعدہ لسه الخيانه سايره فى الأفلاك

يُحْكِي أَنْ

يُحْكِي أَنْ	- أَنْ إِيه
أَنْ غْزَالَه	- غْزَالَه إِيه
شَرْبَت شَرْبَه	- شَرْبَة إِيه
شَرْبَة وَيَسْكِي	- وَ يَسْكِي إِيه
أَمْرِيكَانِي	- كَانِي إِيه
كَانِي مَانِي	- مَانِي إِيه
مَانِي مَرْوَح	- رَوْح لِيه
وَ بِيْتَطَوْح	- طَوْح إِيه
طَوْح إِيْدَه	- إِيْدَه إِيه
إِيْدَه حَدِيْدَه	- حَدِيْدَه إِيه
حَدِيْدَه ف قَلْبَه	- قَلْبَه إِيه
قَلْبَه غَلْبَه	- غَلْبَه إِيه
غَلْبَه الْخَشْبَه	- خَشْبَة إِيه
خَشْبَة حَبْشِي	- حَبْشِي إِيه
شَخْص كَلْبَشِي	- كَلْبَشِي لِيه

كلبش ابويا
ابويا و اخويا
اخويا شهيدى
و التار على ايدى
ايدى ف ايدك
ننتف شنبه
شنبه دنبه
دنبه عفاشه
تحت الكماشه
من اول شده
يورينا الشده
شده نابيه
و عض كلابه
و المالدوعه تقول يا شبابيه
الشجيع اهه اهه
الشجيع اهه اهه
الشجيع اهه اهه



الله يا دايـم هو الدايـم
ولا دايـم غير الله

آه يا زمن كدّاب يا زمان
فى الحدوته وفى العنوان
دنيا مظاهر عايشه الظاهر
والقفطان هو السلطان

حطوا الخوصه على الخوصه
فوق البوصه المفعوصه
تتقمع تبقى عروسه
تتمخطر على غصن البان

واحد حل وواحد ضيف
نط الحل سأل ضيفه
حذر فزر تعرف كيف
تعرف عنتر من خوفو

بات الديك على حد السيف
يتقلب مش عارف كيف
شغل مخه وفرشه وهرشه
وفرده وله وشمه وقرشه

قوللى يامخ ياصنع الكيف
زى ما بين الشتا والصيف
فين الفارق والشتان
بين انفارس والسلطان

صنفر مخه وقشره وبشره
وخربه وظبطه وشاله وحطه
تعب الضيف من لعب السيف
غنى يا عين ويالالى كمان


جاله الهاتف ليلة صيف
فوقه مراية وتحتة حصان
أبيض ف ابيض زى الطيف
قال له يا غافل يا غلبان
عنتر هو جراب السيف
والسلطان حشو القفطان

نزلت أدب

طلعت ادب
نزلت ادب
لقيت الدب بياكل اللب
يا دب الدب يا وسخ العب^٤
نهايته

فضلت أعبى واسب
سألت الدب
منين اللب
سألني اللب
ومين الدب

سألت الدب
منين الدب
جاوبني الدب بقَرش اللب
رجعت اشب وادب واسب
لقيتني تعبت
نزلت ادب
ضربت اللب وخذت الدب
لقيتني غلطت
طلعت ادب
ضربت الدب
وخذت اللب



سهانی اللب وراح للذب
هرشت اللعب
رجعت اسب
یا عب اللب یا کلب الذب
سهیت الذب و لُشت اللب
سهانی اللب
هبشنی الذب
نزلت الب و اشب و ادب
لقییت اللب ف عب الذب

تاك
تاك

* تك تك تك تك تك

- مين

* تين على لوز

- لا لوز على تين

تين على لوز أو لوز على تين

كله مغطى قمر الدين

توته توته
يا تحت التوته
والحدوته و السامعين

جدى يقوللى
النار لا تطفى
لما تولّى على السامعين
كان ياما كان
فى زمان و مكان
كانوا تلاته من التلاتين
كاف مع سين
على زين الدين



عملوا مؤامره
على الباقيين
أصل الشيللو
بيشبه للو
حتى حمار الزبالين
بعد ما شالوا و حطوا و غطوا
ناموا و غطوا و مش داريين
قامت قومه ف عز النومه
لاخلت كاف و لا زين و لا سين
توته توته دى الحدوته
فين التوته
والسامعين ؟



هنا مقص



هنا مقص و هنا مقص
هنا عجائب بتترص
هنا القصر السلطاني
فوق الحلم الانساني
و الانسان محتاج راحه
و الراحه ف قلب الساحه
و الساحه
ملعب عقاريت
و العقاريت عايزين كبريت
و الكبريت تحت المنجم

و المنجم
عايز مجانين
و المجانين عايزين بساتين
و البساتين ف ادينا
و ادينا فيها الخلال
و الخلال محتاج زلزال
و الزلزال جونا
جونا ما جونا
جونا شجر اللبلاب



يتسحب من تحت الباب
يستفرد
يسحب سحب
و يغافل عين الحجاب
و يمدد على باب القصر
هنا مقص
و هنا مقص
هنا زكايب بتترص



يا بو عزه
يا وش القمله
مين قال لك
تعمل دى العمله
يا بو عزه
يا ايد الهون
بكره حيبقى لك كراكون

مين قال لك
يا بو عقل حيطانى
تتنيل
تحلم سلطانى

نام يا مغفل
و اشبع نوم
بكره حتبقى كبير القوم
آخر العوم فى الصلا و الصوم
نغرق فيك
قادر تنطس
هنا مقص
و هنا مقص
وانت قفاك
لازم يترص

أمشير

أمشير على نجعنا
والريح بتصففر
صفر
كل الدروب
صفصفت
ما فى حدا فى الكفر
غيرك
يا عود الزان
يا طرحة الأحزان
جلبى عليك انشغف



وانا جلبى دا خزان
فيه الرفاجه العزاز
بستان وضليله
ونصل خنجر خيانه
غوط
فى ذات ليله
وفيه صبايا حلالك
يا واحد العيله
خافين عليك تنكسر
ونجدد الأحزان

مقال



وعملت بدّاع
وباغنى فى العرب علام
كيف الهالى سلامه
وخليفه
والعلامه
البت مهره كحياه
واسمها
ع اللام
ليلي
لوليه
ليالى
ربنا علام
طلبت الوصال
صحيت مفاتنها
جام رمش عينها شرع
على مهجتي
علام

	مقدمة
٤	مواا
٦	يامصر يامدهشة
٨	الحال
١٠	زيارة الى ضريح عبد الناصر
١٦	هلى بشايرك
١٨	وحدك
٢٠	ياشام
٢٣	العشق ذاهب مذاهب
٢٥	سناا الوراء
٣٦	على علىوة
٤١	الزار
٤٥	طفى النور
٤٨	شرم برم
٥٠	أهوى المدام
٥١	عطشان يا صبايا
٥٢	حادى يابادى





٥٤	يامه مويل الهوى
٥٧	الموعودين
٥٨	حاوى توت
٦٠	حلقا تـك
٦٢	قلعتك حـرز
٦٤	يارينا
٦٦	نام نام
٦٨	طنوش
٧٠	دفشنجى
٧٢	أمر من الصبر
٧٣	يـحكى أن
٧٥	الله يـادايـم
٧٨	نزلت أدب
٨١	تـك تـك تـك
٨٤	هنا مقص
٩٠	أمشير
٩٢	موال

رقم الايداع : ٢٤٦٤ / ١٩٨٩

مطبعة الحروبة ٢٤٦٤٢٥٥